

# Ա Բ Ե Ղ Ա Յ

## ԱՐՇԱՂՈՅՍ ՄԻԻԹԱՐԵԱՆՑԻ

Արեւոցեա զընկեր քո երբև զանձն քո:

Ասէ ցՅիսուս. և ո՞վ է իմ ընկեր, Պատասխանի եա Յիսուս և ասէ. այլ մի իջանէր յերուսաղէմէ յերիջով և անկաւ ի ձեռս աւազակաց, սրք մերկացուցին զնա և վէրս ի վերայ եզին, Թողին կիսամաշ և զնացին...

Աւետարան

### I.

«Յիշու՛մ եմ, յիշու՛մ, օրիո՛րդ, ես այն  
Գիշերն ու կաղնին, որի տակ չոքած  
Երգւեցայ ես ձեզ սիրել յաւիտեան,  
Որպէս չէ սիրել ոչ մի արարած:  
Անցան այդ օրից երկար տարիներ,  
Ես բոլորեցի Հայրենի աշխարհ,  
Տեսայ այլ մարդիկ, այլ դէմք ու աչեր  
Ու ձեր սէրն անցաւ անհետ ինձ Համար:  
Նենգեցի ես ձեզ... Մի՛ խնդրէք զուր ինձ,  
Ոչ աչք արտասուող, ոչ սիրտ աւերւած  
Կարող չեն դարձնել ձեր գիրկն ինձ նորից—  
Ես ձեզ վաղուց եմ վաղուց մոռացած:

### II.

Իբրև Հուր աղօտ շիջաւ ձեր պատկեր,  
Երբ գերեց ուրիշն իմ սիրտն ու Հոգին.  
Եւ Հիմա արդէն ցերեկ ու գիշեր

Նա է միշտ կանգնած աչքիս առաջին.  
 Նորան է միայն իմ գիրկըս բացում,  
 Նորան եմ սեղմում կըրծքիս կարօտով,  
 Նորա՛ շուրթերն եմ անվերջ համբուրում,  
 Ես շունչ եմ առնում միայն նորանով:  
 Բայց մի նախանձւէք, օրիորդ. նորա  
 Համար չէ ժըպտում սյս ուրախ աշխարհ,  
 Ու թէ գիտենաք ինչպէս խեղճ է նա,  
 Ինչպէս տարաբաղդ, աղքատ ու թըշւան:

## III.

Ես ձեզ կը պատմեմ դառըն պատմութիւն  
 Բորբոքող սիրոյ, որ անգըթաբար  
 Չարչարում է ինձ ցաւերով անհուն  
 Ու կը չարչարէ դեռ երկար երկար:  
 Գուցէ կը ներէք դուք այն ժամանակ,  
 Որ ես դըրժեցի երգումըս տըւած,  
 Որ յանձն առայ ես խաչ ու չարչարանք՝  
 Քաղցը ընտանեկան վայելքը թողած.  
 Գուցէ կ'իմանաք, որ կայ մի այլ սէր,  
 Որի առաջին սէրը կանացի  
 Հանգչում է, որպէս լուսին ու աստղեր  
 Յաղթական շողովն արեւածագի:

## IV.

Դա սէրն է ճընշւած, մոռացւած մարդու...  
 Ես տեսայ նորան մի օր ծերունու  
 Խորշոմած դէմքով կանգնած փողոցում՝  
 Ամօթահարւած նա ձեռք էր մեկնում:  
 Նորա լայն թիկունք, նորա բարձր հասակ,  
 Թէև կորացած տարիների տակ,  
 Վըկայում էին, որ անշուշտ մի օր  
 Եղել էր նա քաջ ու կըտրիճ բանոր:  
 Անշուշտ չէր ծնւել այդպէս նա մենակ,  
 Նա ունէր գուցէ և կին և զաւակ,

Ունէր բարեկամ, ծանօթ, ազգական,  
 Ժառանգած հօրից մի յարկ սեպհական:

## V.

Բայց ո՛ւր են դոքա... Ո՞ր ձեռքն անօրէն  
 Խըլեց նորանից օրական պարէն,  
 Ո՞վ քարշեց նորան հայրենի յարկից,  
 Ո՞վ յափշտակեց որդու գըզւանքից:  
 Այգ վաղուց էր շատ. երևի ինքն էլ  
 Կարծում է հիմա լըսած առասպել  
 Խաղաղիկ օրերն հայրենի գիւղում,  
 Հեռու մոռացւած սարի ծերպերում:  
 Եւ ո՞վ ձեզ կ'ասէ—գէպի ո՛ւր հիմա  
 Գողգոթուն քայլով երերում է նա  
 Քաղցած, ծարաւի, մերկ, անկարեկից,  
 Վաղուց դուրս ձրգած մարդկութեան հաշուց:

## VI.

Գնում է... Արդեօք գոնէ մի անգամ  
 Պատահել է ձեզ մընալ տարաժամ  
 Գիշերեան պահուն ճանապարհներին,  
 Մինչ կատաղութեամբ շընչում է քամին,  
 Մինչ մըռայլ ամպեր ծածկում են երկինք,  
 Մինչ չարագուշակ բուք ու փոթորիկ  
 Պըտոյտ են անում ձեր շուրջն երգելով  
 Մեռելաթաղի նըլագ կազմելով.—  
 Այնտեղ է, այնտեղ գընում ծերունին:  
 Ու թող նա գնայ... Մահաշունչ քամին  
 Գըթած կը լինի, գուցէ, մեղանից,  
 Կը փըրկէ նորան այդ գառն օրերից:

## VII.

Եւ որքան այդպէս անտոհմ և անզարմ  
 Ձեռք են կարկառում մեզ ըստեղծւածներ.  
 Իբրև ոսկըր շան, մի մանրիկ դըրսմ

Ձըգում ենք, անցնում դէմքով անտարբեր:  
 Ա՛խ, գէթ մի վայրկեան կանգ առէք այդտեղ,  
 Նայեցէ՛ք նոցա վառուող աչերին,  
 Որքան ցաւ, կըսկիծ, չարչարանք ահեղ  
 Կը կարգաք նոցա խամրած դէմքերին,  
 Կը կարգաք արդար գանգատ ձեզանից,  
 Բողոք ուղղըւած ամբողջ մարդկութեան,  
 Որ խըլեց նոցա տուն ու սերընգից  
 Ու ձըգեց աշխարհ անտէր, անսլաշտպան:—

## VIII.

Ես տեսայ նորան մի այլ օր—մանկան  
 Թոյլ ու նիհարիկ մարմին ըստացած,  
 Սեղմըւել էր նա այն միակ դըրանն,  
 Ուր հաւաքուում են մերժւածն ու զըրկւածն:  
 Բաց գըլուխ և կուրծք, մերկ սըրունգ ու ոտ  
 Այրւում էին վառ արևի տակին,  
 Տարիների կեղտն ու վէրք ժանտահոտ  
 Ծածկում էին խիտ անխընամ մարմինն.  
 Աչքերը հանգած, երեսը դալուկ,  
 Խոնարհած գըլուխն, իբրև մեղապարտ,  
 Կանգնած էր այնտեղ տարաբաղդ մանուկ—  
 Մարդկութեան մեղքի այդ զոհն անարատ:

## IX.

Ես ճանաչեցի.—դա նա է, որին  
 Դեռ ևս արգանդում անիծում է մայրն,  
 Որին արցունքով, տըրտմութեամբ խորին,  
 Իբրև հիւր անկոչ, բերում են աշխարհ.  
 Դա նա է, նա է, որին ըշտապով  
 Մուլթ ու մըռալլի գաղտուկ ժամերին,  
 Օրօրոցի տեղ գընում են քարին  
 Ծընընդեան օրից ցաւին մատնելով:  
 Եւ Աստուած գիտէ թէ ինչպէս դոքա

Շուն ու գազանի ազատած ճանկից  
 Դեռ ման են գալիս աշխարհի վերայ  
 Թէև հալածուած, մերժուած ամենից...

## X.

Քար չէր իմ սիրտըս, օրիորդ. այդ օր  
 Շըրջում էի ես խելագարի պէս,  
 Ես լալիս էի մոռացած բոլորն—  
 Ինչ տանջում էին ցաւեր աղեկէզ:  
 Առաջին անգամ ահա այդ օրեր  
 Ըզգացի, որ լուռ է սէրդ. իմ սրբտում,  
 Որ ապագայի երազած պատկեր  
 Իւր դիւթիչ ուժովն այլ չէ գրաւում,  
 Ըզգացի ամբողջ մարմնովս ու հոգով,  
 Որ կեանք անձնական, վայելք ու բարիք  
 Կարող չէին ինչ անել երջանիկ  
 Պատած-պաշարուած տառապեալներով: